

PENOJA ETEHUE'YO BECANEJJIJJI PEA'AI

2 PEDRO

Penohua tehue ca o'oyanaje Jesusaja epeeji cuana huasijje

1 ¹Eyaya Simohui Peno bajjaniya miquiana huasijje tehueña. Eya Jesosa Quitoja esohui huohui ayequijji poani. Ohuaya eya huoojea ca'yonaje ojaya esohui huohuiya. Oya Jesosa Quito e'e jojo nei Eyacuiñajji, esejaya mimishi cuijea'yojji poani. Quea pame nee nee ojaya esohui. Ohuaya miquianaya ojaya esohui cuana jayojja jama ameesahua cani. Mimishi cuana cuijea ca'yajje ohuaya ecuanaya, miquianaya pea'ai quea boejea po mee ca'yonaje. ²E'e, Eyacuiñajji, esejaya Emeshi Mese nei Jesosa Quito pea'ai miquianajaya eba nei nei. Jamajjeya ¡ohuaya miquianaya cajaanuana cahua quea pame nee! ¡Quea bei nee capo mee cahua pea'ai!

Eyacuiñajjiya eseya babaca'yo majje iyaa canaje

³E'e, Jesosa quea ca'a nee nee ba majje ohuaya eseya ojaya esohui jayojja jama ba'e meesahua cani quea pame nee. Esey a iyaa ca'yonaje ojaya epeeji nei epo meeji, o jayojja jama epojji. Quea ca'a nee, quea pame nee nee po mee cani pea'ai.

⁴Jamajjeya ohuaya eseya iyaa majje huohui canaje jama ba'a: —Miquianaya e jayojja quea pame nee poaje e jayojja quea ca'a nee epo'yojji —aca poa.

Jamajjeya Eyacuiñajjiya ejjashahuabaqui'yojji jayojja jama jjashahuabaqui'yome poaje'yo. Eseyaya ejjashahuabaqui'yojji quea mimishi, quea tai pea'ai pajea mee cajeyo. E'e, eseya pea quea mimishi jayojja pojjeama.

⁵Jamajjeya miquianaya Jesosa Quito nijje jjapeequianijo ¡quea pame ba'ecue! ¡Eyacuiñajjiya esohui cuana ba neineicue pea'ai! ⁶¡Quea ja'a nee jjashahuabaquicue! ¡Jesosa nijje jjapee tiitiquicue! ¡A'a onaa napa cani jjabaquijji! ¡Eyacuiñajjiya ejjashahuabaquijji jayojja jama jjashahuaba tiitiquicue! ⁷¡Eyacuiñajjiya epeeji cuana jaahuanacue quea pame nee! ¡Ojjaña quea jea nee nee acue pea'ai! E'e, ¡quea boti nee acue! ⁸Jamajjeya miquiaaya jamaya atitiñaño Emeshi Mese Jesosa

Quitoja echacojji quea ja'a nee nee poaje, oya miquea eba poanijo. ¡Jesosa Quitoja esohui jama acue pea'ai! ⁹Ojjaña jiquio esohui jama a'ajja aje oe cojjama' jayojja de, quea cojja jama jayojja poani. Quea jashahuabaqui ja'a pojjeama. Jamajjeya pajea ca'yani ma Jesosa Quitohua yahuajo ojaya mimishi cuana cuijea ca'yonaje.

¹⁰Jamajjeya epeejji cuana, ¡quea ja'a nee po tiitiicue Jesosa Quitoja epeejji poanijo! Eyacuiñajjiya yahuajo miquianaya iyaa ca'ya poa quea ja'a nee eba'e'yojji. Cuanaya oya yahuajo jashahuabaquinaje jama ba'a: —Miquianaya ecuea epeejji nei poaje'yo.

Jamajjeya miquianaya Eyacuiñajjiyo quea pame nee atiitiañajo quea mimishi epo o'oyajji pojjeama. ¹¹Eyacuiñajjiya miquianaya dobiqúi mee caje'yo ojaya cuiñajji eyacua huasijje quea bihui nee. Ma cuiñajjiyo Emeshi Mese Jesosa Quito ojjaña huoojea'yojji oe nei poaje'yo tii. Ohuaya miquianaya onijje ba'e tiitii mee caje'yo.

Penohua esohui e'e nei huohui ca o'oyanaje

¹²Jiquio esohui e'e nei miquianajaya eba. Jamaya quea bihui nee atiitiañajo quea pame nee poani. Jamatii eyaya maya huohui majamajaña. Jamajjeya miquianaaya pajea'yo ajja esohui e'e nei. ¹³Jiquio meshijo eshe nequiya jjeya nei eyaya miquianaya jashahuabaqui tiitii meeje'yo ma esohui cuanajo. Jamaya quea pame miquianajo. ¹⁴E'e, esejaya Emeshi Mese neiya, Jesosa Quitohua yahuajo pishana eya huohui canaje jama ba'a: —Peno, quijje pishana miya manoj'e'yo.

¹⁵Jamajjeya jjeyahua nei eyaya miquiana huasijje esohui e'e nei huohui majamajaña miquianajaya epajea'yojji pojjeama e mano'yajo.

Jesosa Quito jiquio meshijo nequi Penohua ba ca poa

¹⁶Ecuaaya miquianaya huohuinaje Jesosa Quitoja epoe o'oyajjiyo. Oya quea ca'a nee nee poeje'yo, Emeshi Mese nei poani. Ecuaaya oya Eyacuiñajjiya Ebacua Ejja banaje ecojjaa. Jamajjeya ecuanajaya esohui e'e nei ojo, etiikianaja esohui yahuajo jayojja jama pojjeama; ojaya yahuajo ba jjimajo ca ca esohui e'e nei pojjeama. ¹⁷E'e, esejaya Chii ai Eyacuiñajji eyajo ani Jesosa Quito nijje miminaje quea pame nee nee. Jesosa Quito oe nei quea ca'a nee nee poanijo miminaje Eyacuiñajji. E'e, Jesosa Quito nijje nequiya eyaya Huani nijje, Jacobo nijje nequiya pea'ai shajja'ajjanaje Eyacuiñajji eyajo quea ja'a nee Jesosa nijje mimiani. Jama poanaje ba'a: —Jesosa ecuea Ebacua Ejja oe nei quea pame nee. Oya ecuea quea jea nee nee. Ohuaya ecuea ejjashahuabaquijji jayojja jama acani —Eyacuiñajji poanaje.

¹⁸Eyacuiñajjiya ma esohui cuana eyajo huohui canijo, ecuaaya shajja'ajjanaje Jesosa nijje eyiyo biajje nequiya. Eyiyojo Eyacuiñajji shajja'ajja majje ecuaana jashahuabaquinaje jama ba'a: —Eyacuiñajji eyiyojo miminaje e'e jojo nei. Jamaya quea pame.

¹⁹Jamajjeya ecuanaja esohui Jesosa Quitoja epoe o'oyajjiyo baña quea ja'a nee. Eyacuiñajjiya esohui huohuijji cuanaja esohui yahuajo e'e nei poa.

Jamajjeya ishajja'ajjacue! Ma esohui yahuajo nei cuaquijiji jayojja jama poa. Jiquio ecua cuaquijijiya mecajje quea apo neejo jeaja'a cani jayojja jama jiquio esohui e'e neiya miqúanaya Jesosa ba meesahua caje, jamatii esohui e'e nei pojjeama huohui cani cuaa quea huiso. Miqúanaya Jesosaja poe o'oyajjijo quea ja'a nee baje ma esohui e'e nei ba neinei majje. Jamatii Jesosaja epoe o'oyajji ca ca jiquio ecua eshequi huiyejji jaasohua majje ja'a'aja'a'a pojebeani jama jjashahuabaqui meemeya se acaje Jesosaa.

²⁰¡Ba neineicue jiquio esohui! Eyacuiñajjiya esohui huohuijji yahuajo nei ba'eca poa esohui tehue mee ca poa. Ma esohui cuana onajaya ejjashahuabaquijji pojjeama, Eyacuiñajjiya ejjashahuabaquijji. ²¹E'e, yahuajo nei dejja cuanaja Eyacuiñajjiya esohui jamatii tehue jjima. Onajaya ejjashahuabaquijji huohui jjima pea'ai. Chojja. Edojjoshahua Pameya Eyacuiñajjiya epeejji quea pame nee cuana ojaya esohui huohui meesahua ca'ya poa.

Esohui huohuijji nisho cuana sijje poani Eyacuiñajjiya esohuijo

2 ¹Yahuajo nei Eyacuiñajjiya esohui huohuijji nisho cuana sijje poa pea cuana huasijje. Jjeyahua nei pea esohui huohuijji nisho cuana miqúanaya que sijje poaje Eyacuiñajjiya esohuijo. Ohua sijje acajje dejja cuana poquiquehua chana' cuaqui yasijje. Esejaya Emeshi Mese nei, Jesosa onaja mimishi cuanajo mano'yonaje. Jamatii oja sohui sijje acanijo esohui huohuijji nishohua Jesosa cajaa acani. Jamajjeya Eyacuiñajjiya oya cuana quea nee nee po mee caje'yo, ojjañaja esohui huohuijji nisho. ²Ona sijje poanijo, quea huiso dejja cuana quea mimishi nee poaje o jayojjaya. Jamajoya esohui huohuijji nisho cuana sijje poani jojaya pea cuana Jesosaja esohui cuanajo mimijajje'yo. ³Cuanaya esohui huohuijji nishohua quea huiso ejjeshejji sa poanijo miqúanaya que ojaya ejjashahuabaqui'yojji e'e nei pojjeama huohui caje. Quea bejjo jeaa jjejojo miqúanaya dasia caje; dasia majje bejjo quea huiso chicha caje.

Yahuajo nei Eyacuiñajji jjashahuabaquia poa esohui huohuijji nisho napajji. Jama poa ba'a: —Esohui huohuijji nisho cuana eyaya baña. Eyaya oya cuana epajea'yojji pojjeama; quea nee nee po meeje'yo e'e jojo nei.

⁴¡Bacue oe! Yahuajo nei nei esohuidojojji cuana eyajo quea mimishi poa. Jamajjeya Eyacuiñajjiya oya cuana quea huesha nee nee jea ca poa, quea misi nee nee yasijje jeajea ca'ya poa quea nee nee epojji. Jomajo oya cuana ecuaya meequi'yojji pojjeama. Ejeyo'yo jama ani, de. Quijje Jesosa Quito poe o'oyajo, Eyacuiñajjiya ma esohuidojojji quea mimishi cuana tecuea neinei majje jeajea caje'yo cuaqui yasijje quea nee nee epo'yojji tii tii.

⁵Yahuajo nei nei ojjaña quea mimishi nee poanijo, Eyacuiñajjiya ena quea quemo nee nee huoojea ca poa; ojjaña mimishi cuana hui'i mee ca'ya poa. E'e, ojjaña meshi cuana ohuajee mee ca poa. Oe dejjaa Noe bajjaniya Eyacuiñajjiya esohui jayojja jama aca poa. Jamajjeya oya hui'i'yo ajja poa. Ojaya bacua ejja, oja osecuajana quea pame cuana pea'ai hui'i'yo jjima pea'ai poa. Me oejje beca, 7 huisome cuana Noe nijje ani Eyacuiñajjiya jaahuana ca poa.

⁶Majoya ojjaña cuana Sonoma cuiñajjijo ba'e, Jomosha cuiñajjijo ba'e pea'ai quea mimishi nee nee poa. Jamajjeya Eyacuiñajjiya ma cuiñajji cuana quiyo jeyojeyo mee ca'ya poa. Chama'yo tii aca'ya poa dejja, equi, aquiana cuana pea'ai. Jamaya Eyacuiñajjiya ojjaña ba mee cani e'e jojo nei ohuaya ojjaña quea mimishi poani quea nee nee po mee caje'yo. Jamajjeya ojjaña quea mete mimishi epojji pocue! ⁷E'e, yahuajo nei Sonoma cuiñajji quiyo'yo jjimahuajo Eyacuiñajjiya ojaya epeeji Noti bajjani Sonomajo ba'e huoojeacuaya ca poa cuiñajji esecue yasijje quiyo'yo jjima epojji. Notiya Eyacuiñajjiya esohui jama atiitii ca poa. Jamajjeya oya quea yeno nee nee poa ojjaña jomajo quea mimishi ba'yanijo. ⁸Ma cuiñajjijo ba'eya Notiya ba majamaja caninaje dejja cuana quea mimishi nee nee; quea shajjaquijjo tii tii poani shajja'ajja caninaje pea'ai. Ohuaya, Notiya ma Eyacuiñajjiya huohui ca poa jayojja jama aca poa. Jamajjeya quea yeno nee nee poa dejja cuana quea mimishi po tiitiiianijo.

⁹Jamajjeya jjeja ecuana ba mee cani jama ba'a: Eyacuiñajjiya ojjaña quea pame nee poani jaahuana cani. Jamajjeya dejja mimishi cuanaja ojaya epeeji cuana quea mimishi epo meeji pojjeama. Ecuana ya ba mee cani jjeja nei pea'ai Eyacuiñajjiya ojjaña quea mimishi poani quea nee nee po mee caje'yo. Quije Jesosa Quito poe o'oyajo, ojjaña mimishi cuana quea nee nee po tiitii mee caje'yo, Eyacuiñajjiya. ¹⁰Pea cuana quea mimishi, quea tai jjashahuaba tiitiiiquiani. Jamaya oya cuana ba'e sa poani. Oya cuana emeshi mese cuanaja esohui shajja'ajja sa po ajja pea'ai. Jamajjeya Eyacuiñajjiya oya cuana quea nee nee po mee caje'yo.

Oya jayojjaya esohui huohuijji nisho cuana quea mase nee nee. Shajjama' pea'ai. Jesosa Quitoja esohuidojojji quea pame cuana niñeba cani mete'amaa jjejojo, bicho'amaa jjejojo pea'ai. ¹¹Jamatii mimishi cuana ca'a'ama ojjaña. Eyajo Eyacuiñajjiya esohuidojojji cuana ca ca quea ca'a nee nee poani. Ma dejjaja ba jjima acani pea'ai. Jamatii ohuaya esohui huohuijji nisho cuana jama niñebame ajjima acani ba'a: —Jesosa, jiquio esohui huohuijji nisho cajaa acue, cuiajea'yocue! —jamaya po ajja esohuidojojji cuana.

¹²Esohui huohuijji nisho cuana ca ca quea mase nee nee. Quea ja'a nee jjashahuabaqui ajja pea'ai. Jamatii ijjiacajji jjabahuonequi jjima jama ba'yani. Jiquio ecua ijjiacajji tiyajo ojjaña sa'ajja cani equecua'yojji jayojja jama esohui huohuijji nisho quea nee nee po mee caje'yo Eyacuiñajjiya. E'e, oya cuana jjabahuejjaqui ajja nei nei. Eyacuiñajjiya esohuijo niñeba cani quea quehuajojo.

¹³Esohui huohuijji nisho cuana quea yeno po mee cani. Jamajjeya Eyacuiñajjiya oya cuana quea yeno, quea nee nee po mee caje'yo. E'e de, quea bihui nee jayojja oya cuana mimishi cuana a sa poani ojjaña pojajjo. Jamatii quea mimishi poani tii miquiana nijje ojee ijji sa poani Jesosa Quitoja bobi. Miquiana quea mimishi po mee sa poani pea'ai oya cuana. ¹⁴E'e, esohui huohuijji nisho cuana epona mimishi cuana jea ba cani; onijje jaa sa poani. Jiquio ecua jeje ajja

tii tii jayojja jama oya cuana quea mimishi po tiitiiani, jashahuaba tiitiqiani quea mimishi epojji. Jesosaja epeeji ca'ama quea mimishi po mee cani pea'ai. Quea dejja tai poanijo pea cuana dasia majje aquiana sii cani pea'ai. Jamajjeya Eyacuiñajji quea quene poani esohui huohuijji nisho cuana nijje. Yahuajo jashahuabaquinaje o huoojea'yojji cuaqui yasijje quea mimishi poanijo. ¹⁵Esohui huohuijji nisho cuana Jesosaja ejiojijje poqui pajea'yo majje cuaquisho'yonaje eshahuaja ejiojji yasijje. Eyacuiñajjija esohui huohuijji yahuajo nei ba'ya poa Beonija bacua ejja Banaami bajjani quea mimishi poa. Ejjeshejji quea huiso sa poanijo Eyacuiñajjija esohui jama a sa po ajja poa. Banaami jayojja jama esohui huohuijji nisho cuana poani, quea mimishi nee nee, de. ¹⁶Eyacuiñajjija Banaami tecuea ca'ya poa yahuajo nei, mimishijo. Mapichi sisi mimi mee ca poa Banaami nijje, Banaami jayojja mimimeya poa. Mapichi sisiya tecuea cajje Banaami ojaya ejjashahuabaquijji quea mimishi pajea ca'yonaje.

¹⁷Jjeya ojjaña esohui huohuijji nisho cuana ena eteohuejja nama'yo, ejoca'yo jayojja jama poani, cajaa ya'yo jayojja. Cuanaya bo poanijo beniya dojocuaji canijo, ena chama' poaje. Eso' equecua'yo epohua'yojji pojjeama quea jabojojo. Jiquio ecua bo dojocuaji cani jayojja ena chama' jayojja jama ojjaña esohui huohuijji nishohua Jesosaja esohui quea ja'a huohuihuohui ajja. Jamajjeya Eyacuiñajjiya oya cuana cajaa acaje; quea nee nee po mee cajje'yo; quea huesha nee nee, quea misi nee nee yasijje jeajea cajje'yo. ¹⁸Esohui huohuijji nisho cuanaja ejjashahuabaquijji quea quehua nee. Jamatii quea miminaa, bicho'ama poani. Oya cuana jashahuabaquiani quea mimishi. Pea cuana, ma yahuajo mimishi pajea'yojji poanaje quea mimishi po mee cajje o'oya. ¹⁹Esohui huohuijji nisho cuana mimishi pajea'yo ajja. Jamatii oya cuana siajje poani tii tii jama ba'a: —Ecuanaajaya esohui cuana shajja'ajja majje imiquianajaya ejjashahuabaquijji jayojja jama atitiicue! —siajje poani.

Chojja, jamaya pojjeama. ¡Bacue! Ojjaña joya mimishi atitiijji poani Edosiquiana o huoojeajji poani. Quea pame nee poanijo ca ca Eyacuiñajji o huoojeajji poani. ²⁰Jamajjeya beca cuaa mimishi pajea ca'yonaje; quea mase popajea ca'yonaje esejaya Emeshi Mese nei Jesosa Quito nijje ejjapeequijji. Jamatii onijje jjapeequi majje aje oe quea mimishi po o'oyanaje. Ojaya esohui shajja'ajja maja sa po'yo ajja poanaje. Yahuajo jama oya cuana ba'e o'oyanaje, Jesosaja epeeji pojjeama jama quea mimishi. Yahuajo Jesosa nijje jjapeequi jjimahuajo oja mimishijo Eyacuiñajjiya oya cuana tecuea cajje. Jesosa nijje jjapeequi pajea'yajo ca ca tecuea neinei cajje'yo. ²¹Jamajjeya ojjaña joya Jesosaja esohui shajja'ajja majje pajea cani, quea mimishi po o'yani Eyacuiñajjiya janobajjima nei tecueajea cajje'yo. Quea nee nee po mee cajje'yo. Pea cuanaja Jesosaja esohui shajja'ajja jjimahuajo quea mimishi poani Eyacuiñajjiya tecuea cajje; quea nee pishana po mee cajje'yo oja mimishi cuanajo. Esohui e'e nei Jesosajo shajja'ajja jjimajo mi tecuea neinei cajje'yo. ²²E'e, jamaya acani cuaa ba'a: “Iñaehuaa bohuii majje bohuii ijja ca o'yani. Cuanaya cuichi topo cajje cuichi quea boejea pepajo besaje o'oya”. Jiquio ecua iñaehua, cuichi pea'ai

jjopi yasijje poqui o'oyani jayojja jama beca dejja cuana poani; Jesosaja esohui shajja'ajja majje pajea ca'yani, poqui o'oyani mimishi yasijje.

**Jesosa Quito poeje o'oya; ma ecua ohuaya
huohui ca poa jamaya e'e jojo nei poaje**

3 ¹Epeeji cuana, eyaya becanejjijji pea'ai tehue'yome anaje ecuea esohui miquiana que. ¡Ecuea etehue'yo yahuajo, ecuea etehue'yo jjeja tehuejo pea'ai miquianaya jjashahuaba tiitiqicue quea ja'a nee Jesosa Quitojo! ²¡Eyacuiñajjija esohui huohuijji quea pame cuanaja esohui yahuajo nei a'a pajea'yojji! Esejaya Emeshi Mese nei Jesosa ese ba'e tiitii mee'yojji. ¡Ojaya esohui pea'ai a'a pajea'yojji! Ohuaya ojaya epeeji cuana huoojea ca'yonaje ojaya esohui huohuiya miquiana huasijje.

³¡Bacue jiquio esohui! Jesosa poe o'oya jjimahuajo pishana quea huiso quea mimishi poeje. Ojaya ejjashahuabaquijji quea mimishi nee nee poaje. Miquianaya soadojo caje Jesosaja epoe o'oyajjijo miquiaa huohuiañajo. ⁴Minijje mimijajije jama ba'a: —¡Dee! Yahuajo Jesosaa huohui canaje ojaya epoe o'oyajjijo. Jamatii poe'yo jjima. Jesosa sijje poani, de. Yahuajo nei nei ecuanaja etiquiana ba'ya poa meshi pana ca jeahuajo. Oya jayojjaya jama poani ojjaña jjeja nei. Jama tii tii. Poe o'oya ajja Jesosa —sijje poaje dejja mimishi cuana.

⁵Oya cuana aje oe quea mimishi; Eyacuiñajjija pana'yo cuana yahuajo nei pajea'yo sa poani. Yahuajo nei nei Eyacuiñajjiya ojjaña aquiana cuana eyajo pana ca'ya poa. Majameta cuana, ba'i, eshequi pea'ai pana ca'ya poa. Meshi cuana pana ca'ya poa. Aquiana cuana ojjaña meshijo pana ca'ya poa, dejja cuana pea'ai. Yahuajo nei nei chama' meshi poa. Ena nei ania poa. Jamajjeja Eyacuiñajjiya ena huosa mee ca poa. Meshi ani cooa poa. ⁶Yahuajo nei Eyacuiñajjiya ena jjayehuejjequi mee ca o'oya poa. Ojjaña mimishi cuana ojjaña meshijo ba'e hui'i'ya poa. ⁷Jjeja nei aquiana cuana eyajo nequi, aquiana meshi cuanao yani pea'ai. Eyacuiñajjiya ojjaña aquiana nequi mee cani. Quijje ojjaña aquiana eyajo nequi, ojjaña cuana meshijo nequi pea'ai quiyojea mee caje'yo. Chama'yo tii po mee caje'yo ojjaña aquiana cuana. E'e, Jesosa poe o'oyajo, ojjaña mimishi cuana quea nee nee po mee caje'yo quea mimishi poanaje sosejje, Eyacuiñajjiya. E'e, ojjaña quea mimishi poani quiyo tiitii nequije'yo cuaquijo.

⁸Ecuea epeeji cuana, ¡pea esohui ecuea shajja'ajjacue! ¡A'a pajea'yojji! Eyacuiñajji ba'e tiitiiani. Jamajjeja quea huiso nee nee, mil shequiajame oe cahuime jayojjaya poani ojo, oya jayojjaya. ⁹Esejaya Emeshi Mese nei Jesosaja epajea'yojji pojjeama ojaya esohui o poe o'oyajjijo. Jamaya acaje ohuaya e'e jojo nei. Pea cuana sijje poani jama ba'a: —Jesosaa ojaya esohui pajea ca'yonaje, de; poe'yo ajja.

Chojja. Jesosa quea mase pojjeamaa jjejojo ishoa cani tii tii ojjaña cuanaja mimishi epajea'yojji. E'e, ese jeajea sa po ajja oya cuaqui yasijje. Quea boejea po

mee sa acani ojjaña. ¹⁰Quijje Emeshi Mese nei Jesosa poecuajije quea huiso ojo jashahuabaqui ajja yanijo. Siipojji poecuajiani jayojja jama poecuajime Jesosa poaje. Oya poe o'oyajo, ojjaña aquiana eyajo chama'yo tii poaje; quiyojeyoje'yo quea shajjaquijjo. Ojjaña meshi cuana, ojjaña aquiana meshijo nequi pea'ai quiyo'yo majje chama'yo tii poaje'yo. ¹¹E'e, quijje ojjaña aquiana quiyojeyo caje'yo. Jamajjeya ¿ae shai poaje miquianaya jjeya nei? ¡A'a quea mimishi pojji! ¡Ba'ecue quea pame nee nee! ¡Eyacuiñajjiya esohui jayojja jama acue quea bihui nee! ¹²¡Jamaya pocue Jesosa ishoa'ajja poani! E'e, ¡oyo chaco tiitiicue! Jamajjeya Jesosa poecuajije jjeya nei pojja'a. Ojo chaco ajjajo, oya jjeya nei poe'yo ajja pojja'a, quijje pojja'a poeje'yo. Oya poe o'oyajo, ojjaña aquiana eyajo nequi quiyojeyo caje'yo. Ojjaña aquiana quiyo jeyojeyoje'yo. ¹³Yahuajo nei Eyacuiñajjiya huohui ca poa jama ba'a: —Quijje eyaya aquiana cuana eyajo panaje'yo eyacua. Meshi eyacua panaje'yo pea'ai eyaya. Jomajo ojjaña cuaa ecuea esohui jayojja jama atiiti caje'yo quea pame, mimishi'ama —jamaya Eyacuiñajji poanaje.

Ecuaaya ishoaña meshi eyacua, eya eyacuajo pea'ai de, quea boejea'yo eba'e'yojji.

¹⁴Ecuea epeeji cuana, ¡bacue! ¡Miquianaya Jesusaja epoe o'oyajji ishoañaajo ba'ecue Eyacuiñajjiya esohui jayojja jama! Jamajjeya Eyacuiñajjiya ba caje miquianaya ojaya epeeji quea pame nee. ¡Jesosa nijje jjapeequicue e'e jojo nei! Jamajjeya Eyacuiñajji miquiana nijje quea bei po tiitije'yo. ¹⁵Jesosa quea tecue pocuaji ajja mimishi cuana nijje. Ishoa cani, jamajjeya mi poe'yani. Jamajjeya ¡jjeya onijje jjapeequi'yocue! Ohuaya eseya ba'e tiitii mee caje'yo onijje eyajo. Jamaya ecuanaja epeeji Pabohua tehue canaje pea'ai miquiana huasijje, ecuea etehue'yo jayojja. Jamaya Eyacuiñajjiya Pabo jashahuabaqui meesahua ca'yonaje quea ja'a nee. ¹⁶E'e, ecuea etehue'yo Jesusajo jayojja jama Pabohua tehue canaje quea huiso nee. Beca esohui ojaya esohui etehue'yo quea camaja ebajji. Jamajjeya beca cuana jashahuaba quehuaquianijo quea ja'a nee huohui ajja Paboya esohui etehue'yo. Oya cuana sijje poani esohuijo. Jamajjeya quijje Eyacuiñajjiya oya cuana quea nee nee po mee caje'yo.

¹⁷E'e epeeji cuana, jamaya miquianajaya eba. Jamajjeya ¡a'a shajja'ajjajji sijjepojji cuanaja esohui! Oya cuana shajja'ajja majje jashahuaba quehuaqui chana'. E'e, esohui huohuijji nisho cuana Eyacuiñajjiya esohui jayojja jama a sa po ajja. ¡O jayojja jama a'a pojji! ¹⁸E'e, Jesosa Quitohua, esejaya Emeshi Mese neiya eseya quea boejea po mee'yo majje ba'e tiitii mee caje'yo onijje eyajo. ¡Ojaya epeeji quea ca'a nee nee po tiitiicue! Yahuajo miquianaya ojaya epeeji eyacua quea ca'a pishana poanaje. Jamajjeya oe pojji miquianajaya eba poanaje. ¡Ojjaña esohui cuana Jesosa Quitojo ba neinei poquiacue! Mahuiso ecuea esohui.

¡Ojjaña cuaa Jesosa Quito cabihua tiitii cahua: —Jesosa Quito, miya quea pame nee nee —jamaya ca'a cahua!

Eyaya, Penohua jiquio esohui e'e nei cuana tehuejeyonaje. Apoa.